

Furriadura in sardu de su contu 'UNA CAPRA PARTICOLARE', chi ndi bessit de sa pàgina sexi (p. 16) de su liburu de MARCO PLACENTINO, "Soleminis. Leggende e misteri. Contus de forredda", Dolianova, Edizioni Grafica del Parteolla 2017.

## “UNA CRABA STRAVANADA”

A mengianeddu chitzi unu massaju fiat lòmpiu a su sartu a fai sa giornnada comenti dònna dii. Lòmpiu a su logu, si fiat acatau ca in su terrenu suu ddui fiat una craba chi no iat mai biu innantis de cussa dii.

Iat pentzau ca calincunu crabaxu dda iat fata intrai, cua-cua, po pasci e po nci papai s'erba. Iat ditzìdiu de dda bociri. Iat pòtziu diaici scramentai a chini dda iat fata intrai a su terrenu suu e, in aciunta, iat pòtziu scrufiri sa petza foras de spendi mancu tres arrialis.

A scupeta a coddu, su massaju fiat acostendi-sì sèmpiri de prus. Iat imprassau s'arma, puntendi-dda deretu a sa craba. Perou, abarrendi meda spantau, iat biu a sa craba movendi-sì de una parti a s'àtera de su terrenu. Fiat sèmpiri stètiu unu àbili cassadori e si domandàt ita cosa cussa borta no nci fiat arrenèsciu a dda pigai beni sa mira. Sa craba si moviat, comenti chi si-ndi fessit bisada ca fiant po dda sparai.

A metadi mengianu, apustis de nci èssiri provau medas bortas po debadas, su massaju si-nci fiat acunnotau e fiat furriau a domu sua.

Iat contau su contu a sa mama bècia, narendi-dda ca no ddu podiat scumponni ca no nci fiat arrennèsciu a bociri una craba. Sa mama, incillia, ddi iat arrespustu:

*«Fillu miu, depis arringratziai ca no ses stètiu bonu a dda sparai. Cussa no fiat una craba, ma un'ànima cundennada chi at pigau is fatesas de una bèstia po anca scontai is pecaus suus.*

*Chi iast fatu mancai sceti una scupetada, ti-ndi fiat torrada agoa a tui etotu, bocendi-dì. No depis mai strobai a is ànimas in pena!». //*